

欽定剿平粵匪方略

欽定剿平粵匪方略卷三百八 壬戌年

五月二十五日 丙午 袁甲三奏言賊匪盤踞九洑

洲對江南岸賊壘如林與石埭橋龍潭等處賊營呼吸相通五月初四日李世忠派隊由六合之通江集渡江進逼南岸石埭賊營該逆倉猝拒敵參將曹玉梁等奮勇力攻踏毀賊營兩座擒斬七八百名當將石埭橋要隘奪回復派參

將黃國棟等乘勝長驅於初六日夜間破龍潭  
賊營三座賊衆敗潰又殲擒八九百名龍潭要  
隘亦卽奪回初七日賊糾大股悍賊數千撲我  
營盤遊擊黃承恩直衝賊陣砍斃黃衣賊目二  
名賊向東陽大路奔潰我軍跟勦又將東陽賊  
營兩座踏毀餘賊向句容逃竄我軍卽就石埠  
橋龍潭東陽等處分別紮營現在九狀洲外援

已絕總兵李顯爵由江浦進攻王明山師船四  
五百號由上游連檣下駛與李世忠會合圍攻  
曾國藩由安慶撥給火藥五千斤米三千石以  
資接濟我軍現於河北紮營十九座搭造浮橋  
爲移營進逼之計查石埠橋距金陵僅二十五  
里爲江南第一要隘其附近龍潭東陽地方又  
爲金陵至鎮江必由之路今經李世忠次第攻

拔不特九湫洲孤立無援可冀得手卽進攻金陵皖揚鎮三營官軍均可長驅直入現仍督飭李世忠一面會合水師圍攻一面仍由江南相機進取奏入

上命議政王軍機大臣傳諭曾國藩袁甲三都興阿馮子材魁玉曰九湫洲對江南岸石埠橋龍潭等處賊壘經李世忠派隊攻拔現會同王明山等師

船設法圍攻九狀洲前據都興阿奏楚師已抵金陵之雨花臺下游水師亦攻克燕子磯觀音門營壘今李世忠連克要隘距金陵僅二十餘里各路軍威甚壯正宜長驅直入力拔堅城鮑超一軍進攻甯國著曾國藩嚴飭該提督迅圖攻克至湖州一城已有李楚材等軍進援鮑超即可移兵高潏等縣與曾國荃等軍四面合圍以杜蘇常逆匪援

救之路該大臣等務當激勵各軍乘此破竹之勢  
迅拔金陵毋稍疏懈曾國藩撥給李世忠軍火糧  
餉具見公忠體國不分畛域嗣後該提督進止機  
宜卽著曾國藩就近節制以期調度妥速龍潭東  
陽旣經官軍駐紮自可扼金陵逆匪赴鎮之路馮  
子材魁玉惟當督飭兵勇遏截丹陽等處股匪分  
道來援李世忠所派渡江之參將曹玉梁黃國棟

等軍業已深入重地尤當慎益加慎斷不可稍有  
挫失著都興阿飛飭黃彬等互相援應不得意存  
歧視

二十六日 丁未 多隆阿奏言 臣 欽奉

諭旨飭令親統馬步官兵赴陝援剿自應厚集兵力  
以期一鼓蕩平然廬郡甫經克復不得不派重  
兵駐守查有總兵石清吉隨征數載疊守名城



布置最爲可恃臣卽飭委統領飛虎等十營駐守廬郡其餘馬步各營分爲三起於五月初十日先派總兵雷正綰副都統溫德勒克西等督率馬步八營由英霍麻羅一帶取道襄陽直入陝境十五日又飭副都統穆圖善金順等率馬步八營繼之臣於十六日親督親兵等八營暨雙福馬隊兼程前往臣擬馳抵麻城卽輕騎間

道赴鄂與督臣官文商辦一切務期計出萬全  
迅殄羣醜仰慰

聖懷

同日托明阿瑛榮孔廣順張芾奏言粵賊盤踞  
山陽藍田東竄之賊復圍攻潼關時徐榮柱一  
軍甫抵陝境僅帶八百餘人隨卽飭令駐紮山  
陽以北之劉嶺一帶牽制賊蹤又飭閩丕敏一

軍分駐牧護關及葛牌鎮之嘉嶺嚴堵北竄俟各路援兵到齊會合夾攻五月初四日潼關圍解逆匪敗竄出境近關一帶肅清臣等卽飭副將張維義等帶領兵團相機前進仍飭閻丕敏等力遏北竄張維義等於初八日督率兵團直抵山陽該匪卽時南竄當將山陽縣城收復惟賊匪雖經遠竄實未大受懲創若經楚省堵截

恐仍回竄不得不嚴加防範且漢中川匪尙未  
剿除現據探報又有藍薛二逆攻陷太平偏近  
陝南亟盼多隆阿援兵早至合力剿洗查山陽  
縣知縣恆椿訓導崔登鼈於城陷時各帶親隨  
殺賊多名力竭被擒同時罵賊不屈遇害最慘  
合無仰懇

天恩從優議卹並於服官地方建立專祠以彰忠烈

瑛啓又奏言同州一帶漢回爭鬪經張芾前往  
高陵臨潼各村勸化均已感激歸順昨日忽得  
探報張芾行至油坊街地方爲回民賺至蒼頭  
村內留住漢回讎殺如故臣已飛飭守備馬振  
麟等趕赴蒼頭探查張芾消息並又帶去告示  
剴切曉諭又查得商州知州曹熙曾任渭南素  
爲回民信服札調該員馳赴渭南一帶設法開

導惟念此次回民之變雖因各處漢民先起釁  
端而回民殺斃漢民爲數過多自知獲罪已深  
勢難遽散必得重兵在握勦撫兼施方可不至  
蔓延應請

旨飭催多隆阿一軍星夜前來由洛陽陝州一帶取  
道潼關督勦陝南川匪臣一面派員迎接卽在  
華州渭南境內相機紮營則聲勢較壯可收勦

撫之功均奏入

上命議政王軍機大臣傳諭駱秉章多隆阿瑛棨曰  
陝省匪股均已回竄雷正綰所部入營入關剿辦  
餘匪無難指日埽平本日據托明阿等奏潼關肅  
清山陽收復餘匪竄赴鄖西是何紹彩一軍正可  
在該處攻剿無須入陝多隆阿現赴鄂省與官文  
會商進剿機宜卽著迅由武昌進發仍遵前旨相

機辦理現在大兵進逼金陵漸次得手難保蘇常之賊不圖旁竄牽掣我軍該將軍行抵豫省務當隨時與官文曾國藩李續宜聲息相通妥爲商辦適中駐紮至瑛棨等所稱藍薛二逆攻陷太平偏近陝南等語藍薛二逆係由何處竄入是否新起土匪著駱秉章查明具奏現在援陝之兵均赴陝東防剿陝南兵甚空虛著駱秉章迅撥勁旅將太



平縣城收復並杜其入陝之路毛震壽行抵何處  
著駱秉章探明催令將漢中布置妥密分帶精兵  
赴省商同瑛棨辦理一切現在該省漢回互鬪張  
芾爲臨潼回民賺留構釁已成亟宜持平辦理著  
瑛棨於雷正綰各軍到省後相機妥辦

上諭內閣曰山陽踞匪勢極窮蹙經副將張維義等  
督率兵圍進剿該匪卽時南竄當將山陽縣城收

復仍著瑛榮督飭在事員弁迅將餘匪殲除毋留  
餘孽山陽縣知縣恆椿訓導崔登鼐於城陷後殺  
賊多名力竭被擒罵賊遇害實堪憫惻恆椿著照  
同知例從優議卹崔登鼐一併從優議卹均於服  
官地方建立專祠以彰忠烈

二十七日 戊申 都興阿奏言欽奉

諭旨飭查通賊副將張威邦行蹤據密探軍情之把

總葉廣全稟稱探聞張威邦同行三四人帶跟役數名於前數日由江上駛並探得船中攜帶銅帽自來火大洋礮十尊小洋礮十數尊洋火藥數百斤已投效於李世忠又言其同行內有張瞎子一名係張國樑部下充當小隊其餘不識姓名等語查該把總所言似有確見應請

旨飭袁甲三就近查明辦理奏入

上命議政王軍機大臣傳諭曾國藩袁甲三曰據都興阿密奏探聞張威邦於前數日同行三四人帶跟役數名由江上駛並探得船中攜帶銅帽自來火大洋礮十尊小洋礮十數尊洋火藥數百斤已投效於李世忠其同行有張瞎子一名係張國樑部下小隊各等語張威邦旣未前往江北都興阿所探投效李世忠之事似屬可信其帶有洋礮火

藥等件則形跡可疑是否真心投效或欲勾結弁  
兵內應均未可知著曾國藩袁甲三各派妥員密  
速查訪或卽札詢李世忠令其押赴曾國藩軍營  
聽候該大臣嚴行審訊如通賊屬實卽遵前旨一  
面奏聞一面正法林福祥恆起劉齊昂米興朝現  
在藏匿何處並可向其根究分別酌辦

二十九日

庚戌

官文嚴樹森奏言陝省山陽逆匪

因聞楚軍將至分股竄犯鄖西計圖牽掣我軍  
五月初六日逆衆由閒道猛撲縣城該署知縣  
梁懋齡督率官兵團勇竭力堵禦初八日何紹  
彩督隊行至何家店地方賊匪馬步二萬餘人  
盤踞城東火車關一帶分股竄徧南關何紹彩  
於初九日親率隊伍分兩翼齊進槍礮環施斃  
長髮老賊多名將火車關逆衆擊退我兵追至

南關外該逆愈集愈衆城上見有救兵亦連開  
大礮夾擊圍城賊匪敗過河北殺斃七十餘名  
奪獲旗械羸馬甚衆我軍當於火車關駐守賊  
復分股數千緊圍縣城何紹彩請催調兵勇赴  
鄖會剿臣等前以何紹彩兵力太單未敢遽進  
現在大股逆衆竄犯鄖西何紹彩雖迎剿獲勝  
而賊勢尙張城圍未解亟宜厚集兵力以資埽

蕩日內金國琛勇丁陸續赴鄭卽當分道援剿  
並飛咨提臣顏朝斌於襄陽各營內豫選勁旅  
馳往會剿一面飛飭署鄖陽鎮總兵訥欽等將  
戰守事宜妥籌布置查鄖陽居全楚上游與關  
陝肩齒相依如鄖屬辦理得手卽飭何紹彩跟  
蹤進剿萬一逆勢臨張卽不能不專顧鄖防免  
致深入爲患奏入



上命議政王軍機大臣傳諭官文多隆阿嚴樹森曰  
入陝逆衆竄犯鄖西雖經何紹彩等迎剿獲勝而  
兵力尙單城圍未解亟宜厚集兵力掃蕩逆氛金  
國琛所部兵勇已陸續赴鄖著官文等迅催前進  
分道援剿並飭顏朝斌挑選勁旅前往會擊勿稍  
遲誤前據多隆阿奏先派雷正綰等督帶馬步八  
營取道襄陽直入陝境雷正綰係陝省總兵著多

隆阿嚴催該總兵趕緊馳赴商南山陽一帶扼要駐紮相機進剿並截賊回竄之路其穆圖善等八營卽著飭赴鄖西會合何紹彩等軍併力攻剿迅解城圍前派多隆阿督辦陝西軍務旋因該逆竄出潼關豫省粵捻交乘復諭該將軍於北路適中之地擇要駐紮刻下漢中渭南等處防堵又當喫緊而渭南等處漢回互相焚掠亟須該將軍統領

大兵入關鎮撫多隆阿已由廬州兼程前進著卽酌度緩急迅速馳赴秦中相機勦辦毋以紆道致稽時日

三十日 辛亥 曾國藩彭玉麟奏言藩司曾國荃督

率所部乘勝攻破周村卡進紮江甯鎮之板橋地方五月初一日曾國荃引軍馳抵秣陵關平毀賊壘奮勇攻擊守關賊會舉衆獻關收降四

百餘人餘悉解散仍飛飭前隊進大定坊繞出  
三汭河後緊逼大勝關初二日派兵設伏進攻  
賊匪乘夜縱火棄巢而遁官軍追殺數百名立  
將大勝關三汭河兩壘攻克時臣彭玉麟駐師  
金柱關聞曾國荃懸軍深入亟約提督王明山  
率水師各營渡江策應駛近頭關適曾國荃整  
旅而來薄關紮營各軍排礮轟擊水陸夾攻立

拔頭關臣彭玉麟會同王明山親督各營直偪  
江心洲飛礮入壘轉戰移時兵勇偪近賊壘縱  
火焚燒我軍齊呼躍入賊衆撲火溺水屍滿江  
流所有賊船百餘號礮數百尊悉行奪獲師船  
乘勝奪取蒲包洲遂泊金陵之護城河口曾國  
荃率隊直偪雨花臺紮營距城不及四里城賊  
數來窺犯輒行擊退臣等查金陵城大而堅未

易猝拔此次水陸兵勇僅二萬人雖濱江重險  
先後攻奪尙難遽爲仰攻之策應俟曾貞幹六  
營多隆阿一軍增調到防再籌大舉

曾國藩又奏言近日軍情自僞輔王楊逆退回  
甯國後浙東賊勢稍鬆江西邊防亦固僞侍王  
尙在衢州一帶左宗棠分兵留守開化馬金街  
以固徽婺之防親率各營赴衢勦辦劉培元所

部已由玉山入浙仍俟蔣益漕大隊到防方可  
由衢嚴分道而進鮑超一軍攻克寒亭等處賊  
壘移營進紮尙距甯郡十餘里頃探聞湖州於  
五月初三日失守鮑超以甯國賊勢太重萬難  
抽兵赴援李楚材由開道馳赴亦因梗阻未能  
趕到臣一聞此信愧憤曷勝俟探明確實續行  
具奏曾國荃一軍由太平下偏金陵本得建瓴

之勢惟兵力不敷僅屯紮南面一隅洪逆似無  
恇懼之情臣擬調多隆阿一軍前往會剿乘此  
軍威極盛四面猛攻當可得手此時各省多故  
處處須兵臣愚謂宜以全力會辦江南先復財  
賦之區則各省可期次第剿辦

曾國藩又奏言提督鮑超統率馬步各軍於四  
月二十五日由青陽拔隊前進甫抵青弋江諜



報楊逆糾衆十餘萬堅守甯國府城洪逆一股屯聚團山圖犯蕪湖南陵等縣楊雄青一股踞紮寒亭獅子山分擾梅家店管家橋一帶以阻進兵之路鮑超知賊勢方盛乃於抱龍岡隔河布營濬治牆濠不遠山戰以懈賊心五月初四日先派劉玉堂等五營潛渡山岡分道設伏復飭周有勝等進薄寒亭誘賊出壘鮑超親督將

士繞越翟村木瓜橋涉淺過河令總兵婁雲慶  
等分左右路聯絡繼進寒亭之賊方以周有勝  
等孤軍深入出巢猛鬪瞥見左右兩路大軍掩  
至正在徬徨而附近村落中羣賊齊出接應數  
逾四萬鮑超令顏紹棠等騰蹕而入直擣中堅  
縱橫盪決明興等率馬隊抄出管家橋宋國永  
等橫躍入陣衝賊數段山岡後伏兵齊出扼斷

歸路唐仁廉撿僞順天安楊民青僞撫天福黎  
奉民於陣馬勝奎等乘勢搶過寒亭浮橋立毀  
護橋二壘賊匪負創驚潰我軍追殺二十餘里  
將寒亭管家橋梅家店至獅子山賊館數十處  
賊壘三十五座同時踏平斃賊六千有奇楊雄  
青糾合零匪遁回甯郡臣查甯國一城屏蔽蘇  
浙逆黨聚至二十萬之多臣深以兵單爲慮自

有此捷而我軍節節進攻圍偏郡城亦漸有可  
乘之隙臣仍檄令速籌攻取此次陣亡將弁等  
另繕清單應請

飭部從優議卹

同日英桂奏言逆匪在澠池新安盤踞邊馬時  
至河灘意圖搶渡經總兵和昌督率在防官兵  
實力防守賊匪已於五月二十二日全股向東

南竄逸現在東灘茅津等渡已無賊蹤惟陝省  
同州等處漢回構釁深恐回匪愈聚愈衆一經  
大兵攻擊難保不竄入晉疆山西蒲絳兩屬均  
與同州毗連臣已飭和昌由東灘渡折赴蒲郡  
沿河駐紮督飭西路各口防兵實力堵禦其東  
路之永樂曲里茅津東灘各渡口仍責成崇安  
劉子城督率官兵常川駐守以防逆捻回竄一

面遠探賊蹤如均已回巢再將防兵酌量裁汰  
以節糜費查此次髮捻各逆自撲潼關以至渾  
池幾及兩旬之久晉省沿河地方文武與帶兵  
各員均能協力同心晝夜防守保全完善尙屬  
著有微勞可否俟邊境一律肅清容臣擇尤酌  
保以昭激勸均奏入

上命議政王軍機大臣傳諭曾國藩多隆阿左宗棠

曰會國藩等奏官軍屢復要隘圍偏金陵擬調多  
隆阿一軍會剿金陵城大而堅自非添調勁旅四  
面合圍不足以制其死命多隆阿一軍前經調赴  
陝西剿辦竄匪該將軍已由廬州兼程前進現在  
川匪竄擾漢南其圍撲鄖西之賊亦須防其回竄  
且同華一帶漢回讎殺迄未休息必得該將軍統  
率大兵入關藉資鎮撫著多隆阿仍遵前旨迅催

雷正綰等軍星速赴陝該將軍亦卽徑赴秦中俟  
陝南軍務廓清卽統率全部馳赴江南會剿以成  
大功現在大軍已齊抵金陵獨多隆阿一軍爲陝  
省牽掣亦勢處於不得已所幸官文曾國藩多隆  
阿皆能通籌大局南北兼顧陝事一竣卽星速馳  
回金陵於大局尙不至掣肘惟現在圍攻金陵兵  
力究嫌單薄所有多隆阿留防廬郡之兵仍著曾



國藩察看情形酌量調赴金陵以厚兵力鮑超進  
攻甯國大獲勝仗攻克寒亭管家橋等處賊壘著  
該大臣飭令移營進逼速拔堅城一俟甯郡克復  
卽可由廣德進至高淳溧水節節掃蕩會同金陵  
水陸各軍擣穴擒渠共膺懋賞現在楚師之抵金  
陵者數僅二萬李世忠渡江之勇都興阿登陸之  
兵爲數亦屬無多曾國藩等務當分飭各營將領

穩慎進攻毋稍大意設有緩急仍須酌量添兵協助湖郡官紳趙景賢等嬰城固守半年有餘可謂殫竭心力卒以援絕而陷殊堪惋惜其失守情形及趙景賢等下落著曾國藩左宗棠迅速查明具奏曾國藩前派由閒道援湖之李楚材一軍究在何處並著查明調撥劉培元所部已由玉山入浙著左宗棠迅將上游被陷各郡趕緊攻克毋得專

待蔣益澧轉致稽遲攻陷湖州之賊是否杭州逆  
匪北竄刻下左宗棠如何進兵勦辦卽將布置情  
形迅速奏聞

上又命議政王軍機大臣傳諭英桂曰逆匪垂涎晉  
省已非一日現在飽掠遠颺並未大受懲創所請  
裁撤防兵雖爲節省餉需起見但恐該逆乘虛回  
竄設有疏虞關繫匪輕仍著飭令和昌等督飭防

兵實力堵禦勿稍疏懈切不可因賊勢較鬆稍涉大意至同州等處回匪愈聚愈衆該處逼近晉疆深虞波及著英桂督飭各該管地方文武員弁豫加保範弭釁無形不可稍有疏失此次在防出力各員不無微勞足錄惟現在該省西路尙難撤防該員弁兵勇等如果始終勤奮保全完善必當量予恩施著俟山陝軍務告竣後再由該撫覈實奏

請獎勵

上諭內閣曰逆匪楊輔青竄踞甯國府城分股屯聚  
團山寒亭等處經鮑超督飭將士奮勇進攻將各  
路賊館賊壘一律踏平斃賊六千有奇勦辦甚爲  
得手卽著鮑超等迅速進剿攻克堅城盡殲醜類  
陣亡之遊擊鄭永福都司陳得勝向全璧都司銜  
守備葛紹賢陳桂林守備彭思賢守備銜千總鄧

顯明黃元義千總羅世發把總劉昭德范瑞恆陳  
泰加王敦富周桂華晏光照陳宏賓外委常子雲  
周樂成均著交部各照本職從優議卹

曾國藩又奏言提督銜福建延平協副將陳由  
立前奉

諭旨飭赴河南軍營當以圍攻青陽正緊經臣奏留  
鮑超軍營隨同進剿茲據鮑超呈稱該員留營

後輒因上年有降補守備鄭陽和藉故告假私往湖南投效統帶多營之事相形見絀遂生觖望竟與儘先副將余大勝先後託病請假相率颺去請將陳山立余大勝鄭陽和秦叅等情前來又臣疊准湖南撫臣毛鴻賓來咨已令鄭陽和帶勇千餘防守邊境河南撫臣鄭元善來函陳山立已行抵河南仍委令赴湘募勇三千是

該員等任意遠颺實屬大干軍令若不嚴行懲辦則此風一開以軍營爲傳舍之地以投效爲遁逃之藪流弊甚大應請

旨將提督銜福建延平協副將陳由立儘先補用副將余大勝降補守備鄭陽和一併革職並請

飭下湖南撫臣撤去鄭陽和帶勇差使查明陳由立余大勝等均不許招勇立營不許逗留境內派



員押回皖南原營責令立功自贖奏入

上諭內閣曰副將陳由立等託故離營輒敢任意遠  
颺別謀投效實屬大干軍令提督銜記名總兵福  
建延平協副將陳由立記名總兵儘先副將余大  
勝記名總兵降補守備鄭陽和著一併革職並著  
毛鴻賓撤去鄭陽和帶勇差使查明陳由立余大  
勝等現在何處派員押送曾國藩軍營以杜效尤

而肅軍律

欽定剿平粵匪方略卷三百九 壬戌年

六月初四日 乙卯 慶端奏言竄擾瑞安之賊自本

年四月十三十五等日爲兵勇民團兩次擊敗  
後分踞桐嶺等處屢圖偷渡平陽叅革道員張  
啟煊率隊沿江扼守守備陳登三等管帶師船  
礮艇在飛雲江上下梭巡十七日賊竄亭頭一  
帶陳登三督軍截擊礮斃賊匪多名瑞安縣湖

石等處鄉團誤中賊計傷亡數人經署瑞安縣知縣黃宗貴激勸整集總兵秦如虎派勇馳援十九二十二十一二等日金角山之賊欲從大樹埭馬嶼等處渡江張啟煊等與鄉團水陸堵剿待賊半渡邀擊立沈賊船一隻燒燬數隻南岸之賊兜殺殆盡北岸賊勢窮蹙奔逃中斃斃命及受傷落水者亦多二十二日該逆分股窺

犯溫州郡城秦如虎督隊出戰賊由西門並三角門衝撲我軍鏖戰經日小有斬擒十四日夜桐嶺大股賊匪突撲瑞安縣城黃載清等揮軍迎擊斃賊多名二十五日黃載清等由北門出勦黃宗貴督隊勇山西路應援斬滅不少是日金角山賊匪二千餘人賊船四十餘號乘潮南渡適道員曾憲德調援之知縣徐承禧一軍馳

抵平陽代理平陽縣知縣蘇金策調團抵禦賊  
船復由上游淺江偷渡徐承禧督隊飛赴江邊  
擊沈賊船三隻賊隨敗其二十六日該逆分股  
撲瑞安之西北兩門千總賴正修等各帶兵勇  
團丁由西門迎擊黃載清等由東門出隊兩面  
夾攻又派千總葉崇慶等管帶兵團由南北兩  
門衝出鏖戰四時之久互有殺傷黃載清衝入

賊隊手刃賊目數名賊始退卻其西路之賊我軍三面圍擊殲斃無算該逆逃至雙山腳師船礮斃尤多二十八日賊分五路來撲瑞安兵勇開礮轟擊該逆梟水過河爬城而上均被守城兵勇擊退黃載清等復分隊由東西北三門出擊陳登三師船沿江開礮並派勇登岸夾攻河鄉民團二萬餘人又從東路山後圍攻賊衆亂

集賢堂 卷之三  
竄我軍分路追殺該逆遁竄回巢由閩調往之  
水陸援師先後馳到已飭秦如虎張啟煊等分  
路進剿迅掃賊氛

慶端又奏言宣平處州金華各路賊援分屯宣  
平松陽交界之湖溪葉川頭等處松陽擊敗之  
匪紮營五木又於舊市等村築壘堅拒五月初  
四日林文察等派撥臺灣兵勇令都司陳慶善



等分爲三隊均從舊市後直攻五木賊壘又派都司林鵬程等隊並親率知府林直等督陣策應署遂昌縣知縣趙守純亦選調民團助戰以截宣平賊援該逆於五木斜連坪塔紫營二十餘座我軍向大壘齊攻賊伏不出各壘逆匪更番出戰我軍以槍礮環轟自辰至申約斃賊一千餘名林文察因大壘之賊伏而不動恐乘我

軍收隊時分路追躡密派兩隊伏於岡背果有  
賊衆二三千包抄林廷標等擊倒賊之大旗其  
五木大壘擁出黃衣賊目揮衆衝擊林直督率  
各軍抵禦林文察等卽令伏兵齊出衝殺酉刻  
賊衆大敗棄壘而逃當將各壘一律焚燬初六  
日探報處金兩路援賊復由宣平齊抵松陽該  
逆修築各壘初七日林文察等仍派隊分兩路

而進自率林直等接應並豫設伏兵我軍衝突  
搦戰該逆踞壘不出我軍佯爲收隊該逆突出  
襲追將及二三里許林文察等施放火號各隊  
回身迎戰伏兵突出擊倒該逆大旗三百餘面  
賊之後隊忽出我軍分兩面攻擊賊竄回壘我  
軍併力環攻山腳突出賊匪數千包抄我後林  
文察等復催豫伏之軍將賊隊衝爲兩段各軍

愈戰愈奮斃賊六七百名餘逆奪路而逃林文  
察等督軍屢擣賊壘勦辦尙屬得手現今乘勝  
進兵迅圖攻克毋任負嵎奏入

上命議政王軍機大臣傳諭慶端曰竄擾瑞安之賊  
經官軍連日勦擊該匪歸併青田壘撲溫郡瑞安  
並由沿江偷渡圖犯閩疆著慶端督飭秦如虎等  
迅速進剿毋令竄入閩境其松陽踞逆經林文察

等督軍屢擣賊壘正在得手卽著催令該總兵等  
迅圖攻克毋任久踞

同日鄭元善奏言粵逆僞齊王藍姓僞宋王路  
姓僞鄭王黃姓僞啟王梁姓等率騎賊二三萬  
人入陝肆擾分股犯豫由閩鄉竄至靈寶圍攻  
縣城適調回陝省之委營總圖克唐阿帶馬隊  
抵境經著知縣杜翊督團會擊自五月初七至

初九晝夜守禦賊遂解而東趨前隊於初九日直撲陝州環城紮營大股踵至河陝汝道廣隆督率陝州知州王貽登陴固守初十日賊合圍死攻蠡擁爬城城上圍勇轟斃賊匪多名城圍遂解賊衆駛竄澠池之英豪鎮新安宜陽境內均有賊蹤十四日副將楊飛熊由洛郡督隊進紮新安城東鐵塔山十八日楊飛熊整軍由鐵

門進剿賊匪已入鐵門鎮西街先踞高坡我軍在下被賊轟擊馬步勇丁均有傷亡楊飛熊躍馬挺矛不避矢石殺賊數十名賊衆嘯聚愈多該副將身受多傷裹創力戰賊復從後掩襲坐馬中礮倒地腰踝均被壓損守備趙鴻先趕上援救突圍而出各軍且戰且走按隊徐撤回駐鐵塔小營賊又追至環撲我軍閉壘拒之斃匪

多名賊始退去楊飛熊乘夜拔營回紮洛郡該副將受傷不能行動所部已暫交參將盧得勝統帶據探步賊尙踞鐵門鎮馬賊已紛駛新安境內勢欲東趨就目前情形而論粵匪勝於擒匪西路重於南路蓋擒匪僅圖飽掠粵匪則最善攻城東路半已彫殘西路則尙稱完善且髮捻蓄謀詭詐盤旋於新滬之交難保非抵隙蹈



瑕意有所待又探聞前竄回皖境股匪由閒道疾馳西上爲勾擾竄突之計設竟北走河干東徧省會全豫關鍵所繫不可不併力扼防當卽飛檄副將楊長春由省赴洛並派駐汝之剛銳三營勇丁一千五百名馳往援助一面商請僧格林沁抽撥馬隊千名毛昶熙派遊擊敖天印勇隊均各星速會剿並咨商勝保親督馬步前

往河洛堵擊以期厚集兵力一鼓殲除

同日瑛檄奏言此次粵匪竄擾陝省民間多有  
傳言僧格林沁勝保帶兵前來勦賊察看民情  
似此二人威望最爲閭閻欽仰若能來陝辦理  
可期得手惟念僧格林沁雖在皖北一帶防勦  
實爲北路屏藩其緊要自倍於西恐無大員克  
代其任可否於勝保袁甲三二員中酌擇一員

專辦西路查咸豐三年勝保在山西一帶追擊  
粵匪使晉省不至徧遭蹂躪秦省亦得免烽煙  
關中人民至今感仰以地理人情而論則勝保  
尤宜儲蒙

聖明酌擇簡放前來大局幸甚均奏入

上命議政王軍機大臣傳諭僧格林沁官文多隆阿  
鄭元善英桂瑛榮曰前因陝省軍情喫緊簡派多

隆阿督辦陝西軍務諭令該將軍督率將領由豫省沿河西上原期馳赴潼關藉資鎮撫兼可迎剿東竄賊匪保全晉豫地方嗣因多隆阿一軍須由六安繞赴襄陽入陝復經諭令該將軍探明道路迅速進行毋庸紆道楚省現在陝南竄匪尙未剿除著多隆阿恪遵疊次諭旨迅催雷正綰等進行入陝第二三隊卽陸續繼進毋得稍事遷延其竄

至澗池一帶之賊經楊飛熊整軍迎擊身受多傷  
乘夜拔營回顧洛城該逆有圖占洛郡窺伺汴梁  
之說已諭令勝保馳赴洛陽督兵剿洗鄭元善著  
卽回省布置以顧根本現在山陝回豫之賊意圖  
侵軼洛中東偏省會鄭元善以關繫豫省全局商  
請僧格林沁抽撥馬隊千名飛咨毛昶熙酌派敷  
天印帶隊來援僧格林沁定能先其所急如數調

機僧格林沁所派各隊到齊後卽著鄭元善會合  
勝保各軍將此股竄匪迅速殲除毋令蔓延貽患  
豫省官軍接仗失利賊勢益張現在盤旋於新澠  
之交去晉疆均不甚遠仍著吳桂督率在防文武  
會同成明所帶京兵嚴密守禦毋稍鬆懈瑛榮請  
飭勝保赴陝因豫省軍情緊要必須勝保移兵前  
往多隆阿計日卽可抵陝是以仍令督辦陝省軍

務以期事權歸一至信陽一帶踞匪前經官文派  
歐陽正墉越境攻剿著官文仍遵前旨嚴飭該員  
會同豫省兵勇合力兜剿以期及早廓清

上又命議政王軍機大臣傳諭勝保曰前因陝省軍  
情緊急曾諭勝保將苗練一事辦理就緒卽移軍  
而西進紮河洛惟其時河洛一帶楊飛熊可以  
堵截該大臣尙可無須離皖乃現在回竄粵匪勢

甚狻猊揚飛熊一軍業已挫敗鄭元善帶兵前赴  
省城亦祇能顧及會垣且其籌畫軍情亦不如勝  
保之優長設該逆占踞河洛圖竄省城則豫省完  
善之區必遭蹂躪皖北本係殘破之區苗沛霖自  
加恩免罪後剋期以擒張落刑爲立功地步是皖  
省情形較之豫省緩急大相懸殊勝保前奏有親  
統馬步五千名前赴沈項督剿之語著卽星夜兼



程前進馳赴河洛督軍勦辦回竄陝匪僞賊衆兵  
單不敷進剿卽將該大臣留皖各軍一併調往以  
厚兵力鄭元善前赴河洛並著會商進剿

同日

上命議政王軍機大臣傳諭曾國藩曰前據曾國藩  
等奏官軍進偏金陵因兵數不敷分布俟增調多  
隆阿等軍到防再籌大舉當經諭令該大臣必須

慎益加慎不可輕易進攻或致挫失因思鮑超一  
軍進取甯國約計以一萬之師抵禦二萬之賊雖  
日來攻拔寒亭等處要隘而賊勢太盛鮑超所部  
兵勇亦不免單薄且前據奏該提督平日馭將過  
嚴將士有渙散之意頓兵堅城日久不無可慮著  
該大臣密飭該提督於勇往之中仍須加意慎重  
甯國廣德爲蘇常門戶賊以全力死守若官軍奮

勇進攻傷亡必衆鮑超營內是否必須添兵協助  
方可萬全之處著曾國藩迅速妥籌辦理如須添  
兵以何路之兵爲最宜卽著酌量調派毋失機宜

初六日丁巳袁甲三奏言原任安徽布政使李孟

羣於咸豐九年二月間在廬郡所屬之長城地  
方陣亡業經奉

旨開復原官照布政使陣亡例議卹維時該藩司之死

或云力竭陣亡或云不屈遇害傳聞異辭不足以昭垂後世臣於廬郡復後卽飭委員查訪李孟羣死事情形已得大概查李孟羣於咸豐八年夏間帶兵至廬郡之店埠正值軍情緊急福濟因病乞假李孟羣接署巡撫事務未十日而廬郡告陷革職留營紮營長城爲規復廬郡之計因係獲咎卸事之員呼應不靈兵勇五千半

載之久得餉不及兩萬李孟羣力守險要屢次  
截擊竄賊均能獲勝九年二月陳玉城糾合大  
股圍攻長城營盤李孟羣以飢卒數千當悍賊  
六七萬固守十餘日糧盡援絕十五日軍火俱  
無賊攻愈急參將潘羅成等八員死之十六日  
營陷李孟羣自率親隨拚命格鬪手刃悍賊數  
名力漸不支受傷被執其文案親隨員弁州同

張湘甲等以身殉者二十員名該藩司被執後  
厲聲罵賊被賊擁入廬城數日不食罵不稍輟  
遂被害於廬州西門內賊中被脅之衆有稍知  
大義者將該藩司就地掩埋前已購綫尋獲遺  
骸檢得親筆絕命詞四章確有可憑近城父老  
縷述李孟羣當日罵賊受刃情狀至今尚有流  
涕而道者是其臨難不屈大節懷然是爲人倫

表式既經查明實蹟應請

旨交

國史館纂入列傳並准於廬州府死事地方建立  
專祠其任內一切處分悉予開復至隨同該故  
藩司陣亡者二十八員名開單恭呈

御覽仰懇

天恩飭部均照陣亡例分別議卹一併附祀再據李

孟羣之堂兄知縣李孟基呈稱李孟羣之父湖北按察使李卿穀在武昌省城殉難已荷

恩卹於武昌專祠外准於原籍固始縣自建專祠請將

李孟羣及隨同死難各員一併從祀並懇

俯如所請以酬忠藎奏入

上諭內閣曰原任安徽布政使李孟羣轉戰廣西湖北安徽等省忠勇性成功蹟懋著茲覽其死事詳



細情形被害尤爲慘烈孤忠可憫大節無虧允宜  
渥沛恩施以光泉壤李孟羣著照巡撫陣亡例從  
優議卹任內一切處分悉予開復其死事地方建  
立專祠至隨同陣亡之參將潘羅成知縣高堃衛  
守備馬錫祿守備朱清珍縣丞李綸田千總梁志  
品康玉麟把總李桂林州同張湘甲府經歷周壽  
嵩縣丞沈麟圖從九品高傳芬敬克猷周德治監

生趙廷煥生員張之瑾從九品銜周日襄千總倪  
人傑張首魁張玖乾孫全勝把總謝世望黃占魁  
外委原得勝劉啟光向宏亮包宏興軍功魏鵬九  
均著照陣亡例分別議卹一併附祀以彰忠節伊  
父李卿穀原籍固始縣專祠並准將李孟羣及隨  
同死難之潘羅成等二十八員名一併從祀以示  
篤念忠烈有加無已至意

同日馮子材魁玉奏言查句容縣屬之龍潭東陽地方濱臨大江距鎮城西南九十餘里前經李世忠派兵南渡在該二處並石埠橋一帶分紮營盤爲會合進攻之計臣等卽飭總兵陶茂森前往龍潭察看情形嗣接探報僞忠王之子黃老虎等帶賊六七千圍撲東陽營壘分股直逼龍潭勢甚危急六合援兵未到自應撥隊接

應臣等當飭總兵文龍德等督帶步隊二千往援副將林從太等馬隊繼之於五月二十四日行至倉頭地方果見逆股數千蠡擁而來排列火器阻扼去路文龍德等分投迎勦鏖戰約兩時許斃逆百餘名逆酋稍衰惟該處依山傍河形勢窄險處處皆可設伏且遙見黃旗簇擁賊氛繚互懸軍深入恐有疏虞遂於酉刻收隊回

鎮旋據探報二十五日龍潭官兵營盤業已撤  
隊全回六合南岸逆援屬集未知所嚮臣等惟  
有督飭鎮防內外水陸各營晝夜戒嚴靜以待  
動斷不敢稍形鬆勁亦未便遽事張皇聽候上  
游官兵消息相機辦理奏入

上命議政王軍機大臣傳諭曾國藩袁甲三都興阿  
馮子材魁玉曰前據袁甲三奏李世忠一軍乘間

渡江奪回南岸石埠橋龍潭東陽等要隘分紮營盤爲進倡金陵之計當經諭令馮子材等遏截丹陽等處援匪原恐李世忠之軍深入重地稍有挫失本日據馮子材等所奏情形自係賊匪悉衆爭奪要隘六合援軍未到馮子材派去之軍又中途折回是以龍潭營盤相機撤退但未知曾否接仗失利抑係悉衆自行撤回著曾國藩袁甲三查明

確實情形具奏其石埭橋東陽之軍是否一併撤退並著查明奏聞以慰廑念現在上游各軍圍偏金陵王明山等師船剋日下駛當可會合李世忠一軍將九狀洲克復然後以全力進取方有把握此時功在垂成務須嚴飭各帶兵將弁步步爲營站穩一步再進一步斷不可輕進貪功稍有挫失諒曾國藩等成算在胸必能通籌全局剋日奏功

也如上游各軍會攻九洲等處都興阿馮子材  
等務卽飭軍策應不得意存歧視致有疏虞文龍  
德等赴援之軍是否藉詞折回儘有見賊畏葸救  
援不力情事著馮子材據實查叅毋涉徇隱前據  
都興阿奏克復江心洲等處該處距九洲若干  
遠近現在有無官兵駐守著都興阿查明具奏

初七日

戊午

都興阿奏言

臣接奉



諭旨知陝省復有軍情上廑

宸念現飭多隆阿前往督辦查多隆阿隨臣在湖北  
多年屢破大敵保固楚疆該將軍剛毅果決識  
見高超實爲近世不可多得之將材今奉

旨調陝督辦軍務仰見我

皇上聖明洞照用得其人曷勝欽佩以多隆阿之忠  
勇到陝布置自不難一鼓蕩平軍情事體重大

陝省情形臣未深知又何敢率行奏留上瀆

天聽惟查淮南郡邑地勢極寬收復匪易十年之久  
今始肅清曾國藩現駐安慶相隔甚遠李續宜  
紮於霍六兼顧楚疆鞭長莫及勝保剿撫兼施  
富以淮北爲重袁甲三餉絀兵單自顧不暇李  
世忠人數雖多分守甚廣又地多蹂躪民難歸  
業餉源更無所出鎮揚兩軍僅能自守刻下情

形惟資多隆阿一軍居中重鎮聲勢方能聯絡  
且該將軍所部節制之師人人憤戰聲威遠播  
今若遽行抽調則嫉其功能者固喜其赴陝而  
畏其威勇者亦幸其遠離廬東各屬遼闊江淮  
上下空虛設南逆乘隙復逞北捻生心覬覦則  
各路仍防不勝防剿不勝剿更恐豫東江淮皖  
楚同爲喫重合無仰懇

天恩俯鑒東南軍務大有轉機若陝省情形較鬆可  
否請

旨暫留多隆阿幫同會國藩督辦江皖軍務駐師北  
岸爲會國荃等後路聲援則南剿髮逆北懾捻  
氛不止克復金陵較易實保全大局之緊要關  
鍵也奏入

上命議政王軍機大臣傳諭官文會國藩都興阿多

隆阿曰前以逆匪東竄出關當卽諭令多隆阿等酌量於豫省適中之地扼要駐紮嗣因瑛棨奏漢回仇殺日甚一日方疊次諭令多隆阿遵旨星速赴陝現在漢回仇釁已深必須懾以兵威方可漸就範圍仍著多隆阿嚴催雷正綰等星馳前進剋日抵陝多隆阿若能將秦中漢回事宜迅速辦竣仍督率所部出關會同曾國藩等圍逼金陵方不

致顧此失彼儻多隆阿全軍爲陝西牽掣江淮一帶少此勁旅亦屬非計仍著官文等統籌全局陝省勦辦事宜若責成雷正綰等督兵前往即可成功卽催令雷正綰督兵前往多隆阿卽可仍遵前旨督率後起各營駐紮適中之地爲江淮各路屏蔽毋庸遽行入陝似於全局尤有裨益其是否可行及應於何地駐紮之處著官文會國藩多隆阿

相機會商具奏

同日大學士刑部會奏言臣等遵查已革兩江總督何桂清當丹陽失守大營再潰時既不能收集潰散力挫兇鋒又不能督率紳團嬰城固守輒以總督重臣首先託詞退避以爲合省逃官之倡抵蘇後巡撫徐有壬勸令折回無錫紮營不允一聞和春繼至常營失利又以照料糧

臺爲詞徑退常熟迨和春身故始向無錫進發  
奏明紮營望亭望亭爲無錫要衝乃又於蘇州  
失守之前一日以扼守江海要區爲詞繞越劉  
河福山退至上海以致蘇常松太各府州縣相  
繼淪陷至今尙未收復誠如

聖諭誤國殃民厥咎甚重實屬罪無可逭徧查刑律  
如臨陣先退棄城而遁失誤軍機失陷城寨各



條均罪至斬候而止惟迹其節節退避貽誤地方情節較重臣等公同商酌應請將已革兩江總督何桂清照守邊將帥被賊攻圍不行固守而輒棄去因而失陷城寨者斬監候律上從重擬以斬立決恭逢咸豐十一年十月初九日恩詔不准援免惟究係曾任一品大員且由斬候加至斬決重罪非臣等所敢擅擬仍恭候

欽定再六月熱審減刑期內刑部向不呈進立決本章推原例意蓋由體恤人犯起見今何桂清一案情節重大且係奉

特旨定罪之案臣等是以未敢拘泥常例合併聲明  
奏入

上諭內閣曰已革兩江總督何桂清身膺重任輒敢棄城逃避致令全局潰散實屬罪無可逭惟朝廷

明慎用刑何桂清曾任一品大員自當衆議僉同  
方足以伸國憲而昭公允著大學士六部九卿翰  
詹科道將何桂清各供並給事中郭祥瑞謝增等  
各摺再行公同會議定擬迅速具奏

大學士刑部又奏言據何桂清呈出司道公稟  
一件係前任江蘇按察使查文經前任江甯布  
政使薛煥江南鹽巡道英祿江安糧道王朝綸

於丹陽失守後聯銜稟請何桂清退守蘇州據  
原稟內稱丹陽失守蘇常均危如累卵和春許  
乃釗已到常州足資堵禦蘇州十分空虛不可  
無人主持擬請駐節蘇州以繫民望等語當時  
何桂清將以上各情臚列入奏冀圖掩飾欽奉  
硃批聞風先遁民望何在仰見

聖明洞鑒臣等欽佩難名查該司道等既在常州駐紮

均有地方之責當丹陽失守常州危急之際應如何幫同總督竭力守禦保衛地方以冀挽回大局乃首先聯銜稟請總督退守蘇州以繫民望爲名實則搖動人心顯係該司道等見事危急意在同逃故聯銜稟請總督先行以爲脫身之計是何桂清之身罹重辟地方之慘遭荼毒皆該司道等爲之厲階相應請

旨飭下該督撫查明該司道等當時如何聯銜具稟  
及如何一同退避各情形據實奏請治罪奏入  
上諭內閣曰何桂清呈出司道公稟一件係前任江  
蘇按察使查文經前任江甯布政使薛煥江南鹽  
巡道英祿江安糧道王朝綸於丹陽失守後聯銜  
稟請何桂清退守蘇州各情該司道等均有地方  
之責當常州危急之際應如何幫同竭力守禦乃

聯銜稟請退守蘇州顯係見事危急意在同逃若不從嚴查辦何以肅軍律而飭官方著曾國藩李鴻章將該司道當時如何聯銜具稟及如何退避各情形據實查明具奏

初八日 己未 袁甲三奏目前奉

諭旨飭拏已革副將張威邦密派都司楊載華馳赴滁州面見李世忠商辦茲據李世忠呈稱本年

五月初旬張威邦由上海來滁據稱上年防守  
海甯州城兵單賊衆糧盡援絕於十二月初二  
日失事該副將督隊巷戰身受重傷昏迷墜馬  
被親隨背負突圍而出至上海醫治平復擬赴  
曾國藩軍營投到聽候查辦行抵滁州感冒風  
寒懇暫留住等情李世忠因威豐九年與張國  
樑會勦浦口時曾與張威邦共事熟識此次路



過滁州查驗患病屬實飭令趕緊調治一俟稍  
痊卽行就道其有無通匪之處該提督不知底  
細已遵

旨照會臣派往之都司楊載華立將張威邦拏獲並  
派江蘇候補道許厚如等於五月二十七日押  
解起程赴會國藩軍營聽候審辦等情謹據實  
覆陳奏入報

